

هي كدا



مين اللي شاف دمع النهار

ساعة الغروب؟!!

أو حسّ من لونه الحزين

ان الهوام المستحيل

لو يوم يتوب؟!!

مين كان يصدّق

لو يشوف الشمس تستنى القمر؟!!

أو كان يصدق انها تسلّم عليه؟!!

أو عشقها...

جايب زمن يغوى السهر

وسنين طويلة تعدّها وتشتاق إليه

مين كان يصدق
في القمر دمع البُكا؟!
والشمس هالة من الفرح
والزقزقة زفة عصافير
ساعة اللقا
والشقيقة...
جابت دفا..
مع دق قلبه اللي انشرح!
مين كان يصدق
إن الندى دمع الشجر
لما سمع أصل الحكايه كلها؟!
مين كان يصدق أو يشوف
ورد الشتاف عز الشتا

يعيش الربيع
ويشّد حيله ف ربح عتي
ورافض يضيع؟!
مين كان يصدق
إن الهوا يهزّ السحاب
تنزل مطر
يغسل قلوب يوم
هدّها طول السفر؟!
مين اللي قال..
إنه خيال؟!
أو حلم في الزمن المحال!
ما تقولش ليه
إنه القدر..

لما أمر...

إن الغرام

هو اللي يعمل معجزة

يكسر قوانين البشر

وحاجات كثير متبروزة

ما تقولش ليه إن السما

تبعت رسالة تقول لنا...

إن الهنا وعد انكتب

وتهزنا قدرة إلاه...

عالى ف سماه

لما يريد...

إياك تدور ع السبب

ماتشوف آياته وحسها

في الكون دا كله وعِدها

جواك حاجات ومعجزات

ليها العجب...

وان قلت لك صدق بقي

هاتقول: جنون،

وان الحياة ماشية بقانون

يا صاحبي...

حكمة خالقنا مفرقة...

ع الخلق رزق..

مالوش حدود

ربك على العشاق وجود

يسر ولقا...

صدق بقي...

الضيّ

في عيون القمر

هو الحياة...

والشمس تفضل عمرها

هي الدفا والشقشة

بسر الإله